

ԿԱՐԾԻՔ

Թ.00.01 – «Փիլիսոփայություն» մասնագիտությամբ

փիլիսոփայական գիտությունների թեկնածուի գիտական աստիճան հայցող Սոնա Արայի Դավթյանի՝ «Կենսաբարոյագիտությունը որպես միջգիտակարգային գիտելիքի և արժեքանության նոր ձև» թեմայով ատենախոսության մասին

Արդի փիլիսոփայական հետազոտությունների շարքում բավականին լայն տեղ են սկսել զբաղեցնել կենսաբարոյագիտական ուղղվածություն ունեցող հետազոտությունները: Կենսաբարոյագիտական հետազոտությունների զգալի մասը, որը վերաբերում է բուն կենսաբարոյագիտության, բժշկական էթիկայի ու դրանց հարակից հիմնախնդիրներին, մի շարք նվիրյալների շնորհիվ հնարավորինս մանրամասն ուսումնասիրվում է, սակայն հետազոտություն, որը կդիտարկեր կենսաբարոյագիտությունը որպես միջգիտակարգային գիտելիքի ձև և առանձնահատուկ կարևորություն կհաղորդեր կենսաբարոյագիտությանը, որպես արժեքաբանական դրսևորման ձևի, փիլիսոփայական համալիր ուսումնասիրությունների տիրույթում ըստ էության գոյություն չունի: Սույն ատենախոսությունը մասամբ ուղղված է հենց այս բացը լրացնելուն:

Ըստ էության պաշտպանության ներկայացված ատենախոսության նպատակն է՝ բացահայտել կենսաբարոյագիտության՝ որպես միջգիտակարգային գիտելիքի նոր ձևի փիլիսոփայության էությունը, ինչպես նաև՝ վեր հանել կենսաբարոյագիտության դերը ժամանակակից գիտական գիտելիքի դաշտում:

Ատենախոսության առավելությունների շարքում աչքի է զարնում հատկապես այն հանգամանքը, որ հեղինակն ուսումնասիրել է բավականին մեծ ծավալի գիտական գրականություն, ինչն ընդգծվում է ատենախոսությունում առկա հղումների ու հարուստ գրականության բանակով:

Հեղինակի առաջադրած և հիմնավորած նորույթների շարքում արժանի են հիշատակման հետևյալ դրույթները:

1) «խիստ գիտակարգային իմաստով կենսաբարոյագիտությունը գիտություն չէ, ավելի շուտ գիտական, փիլիսոփայական ճանաչողության գործընթաց է, գիտական գիտելիքի կազմակերպման նոր ձև»:

2) «գլխավորը հասկանալն է, որ միջգիտակարգայնությունը, ներառյալ բազմակարգայնությունը, ինտեգրատիվությունը չեն գիտության միասնական հիմք ստեղծում, այլ տարբեր գիտությունների միջև փոխգործակցության ճկուն կապեր հաստատելը, ինչը հրականություն կդառնա բարդ համակարգային մտածողությամբ գիտնականների և փիլիսոփաների նոր սերնդի ի հայտ գալով»:

3) «կյանքի առողջության և մահվան խնդրաշարի նկատմամբ պահանջվում է փիլիսոփայական իմաստավորման նոր մակարդակ, ինչին էլ հենց կոչված է կենսաբարոյագիտությունը՝ որպես կյանքի, առողջության և մահվան պրակտիկ փիլիսոփայության ուրույն ձև»:

Այս դրույթները գործնականում արժարժվող հիմնախնդրի հետագա մշակման բավականին հաջող մեկնակետ կարող են հանդիսանալ:

Բայց և այնպես, ատենախոսության մեջ նկատվել են հետևյալ թերացումներն ու վրիպումները.

1. Էջ 43-ում հեղինակը գրում է. «Բարդությունը ոչ թե պարտքի և անձնական շահերի, այլև պարտքի և պարտքի միջև ընտրության մեջ է»: Ո՛չ անմիջապես այս ձևակերպման մեջ, ո՛չ էլ համատեքստից պարզ չէ, թե ի՞նչ 2 պարտքերի միջև կատարվող ընտրության մասին է այստեղ խոսք գնում:
2. Էջ 81-ում հեղինակը բերում է այն միջը, թե. «Հին Հռոմում արորտը հանցագործություն կամ անբարոյականություն չէր համարվում և լայնորեն տարածվում էր»: Այս մտքի հետ այնքան էլ համամիտ չեմ, քանի որ «Հիպոկրատի երդման» տեքստում ի սկզբանե եղել է այսպիսի հատված՝ «... երդվում եմ երբեք կեղծը չտալ գործիք՝ հղիության ընդհատման համար»: Իսկ սա խոսում է առնվազն այն մասին, որ անտիկ աշխարհում արորտը եթե հանցագործություն չի էլ համարվել, ապա գոնե չի խրախուսվել:
3. Ատենախոսության մեջ տեղ են գտել մի շարք տեխնիկական բացթողումներ, տառասխալներ ու անճշտություններ, օրինակ՝ էջ 4 «...ըստ այն սահմանմամբ...», էջ 11 «...փորձվել է...», էջ 13 3-րդ տողում «խթանել» եզրույթը ավելորդ է և այն:

Այսուհանդերձ, սույն ատենախոսությունը կարող է գնահատվել որպես աշխատություն, որը կարող է գնահատվել իբրև փիլիսոփայության բնագավառում կարևոր նշանակություն ունեցող հենդրի լուծում:

Այսպիսով, ուսումնասիրելով ատենախոսությունը և այդ թեմայով հրատարակված աշխատանքները, արձանագրում եմ, որ ատենախոսության թեման արդիական է, գիտական դրույթներն ու եզրակացությունները՝ հիմնավոր, ճշմարիտ ու արդիական ինչպես նաև հավաստում եմ, որ ատենախոսությունը համապատասխանում է ՀՀ ԲՈԿ-ի կայքում հրատարակված «հայաստանի հանրապետությունում գիտական աստիճանաշնորհման կանոնակարգի» 6-րդ և 7-րդ կետերին: Ատենախոսության մեջ առժամովող հիմնախնդիրների և դրանց լուծման կարևորությունը թույլ է տալիս եզրակացնելու, որ այն բավարարում է թեկնածուական ատենախոսություններին առաջադրվող պահանջներին, իսկ ատենախոս Սոնա Արայի Դավթյանը արժանի է Թ 00.01 -- «Փիլիսոփայություն» մասնագիտությամբ փիլիսոփայական գիտությունների թեկնածուի գիտական աստիճանի շնորհմանը:

12.05.2021թ.

Պաշտոնական ընդդիմախոս՝

Աշոտ Արամայիսի Գևորգյան
փիլ. գիտ. թեկնածու, դոցենտ

Փիլիսոփայության ֆակուլտետի թեկնածու, դոցենտ Ա.Ա.Գևորգյանի ստորագրությունը

ՀՊՄՀ ԳԻՏ



Ա. Իսպիրյան